

TANGAZO LA SERIKALI Na. 30 la tarehe 12/1/2024

SHERIA YA SERIKALI ZA MITAA (MAMLAKA ZA MIJI),
(SURA YA 288)

SHERIA NDOGO

(Imetengenezwa chini ya kifungu cha 89)

SHERIA NDOGO YA AFYA, USAFI NA USIMAMIZI WA MAZINGIRA YA HALMASHAURI
YA MANISPAA YA IRINGA YA MWAKA 2023

Jina 1. Sheria Ndogo hii itajulikana kama Sheria Ndogo
ya Afya, Usafi na Usimamizi wa Mazingira ya Halmashauri
ya Manispaa ya Iringa ya Mwaka 2023.

Matumizi 2. Sheria Ndogo hii itatumika katika eneo lote la
Mamlaka ya Halmashauri ya Manispaa ya Iringa.

Tafsiri 3. Katika Sheria Ndogo hii, isipokuwa kama
muktadha utahitaji vinginevyo-
“Afisa Mwidhiniwa” maana yake ni Afisa yeyote
aliyeteuliwa na Mkurugenzi kwa lengo la kusimamia
utekelezaji wa Sheria Ndogo hii;
“chakula” maana yake ni kitu chochote kinacholiwa na
binadamu na inajumuisha maji na dawa;
“chanzo cha maji” maana yake ni eneo lolote ambalo
limetengwa kwa ajili ya kuwa chanzo cha maji kwa
matumizi ya jamii ikiwemo visima, mito,
chemchemi, vijito na maeneo yote ambayo maji
hupatikana;
“Halmashauri” maana yake ni Halmashauri ya Manispaa ya
Iringa;
“hati ya usafi” maana yake ni hati inayotolewa na Afisa
Mwidhiniwa inayothibitisha kukaguliwa kwa
maeneo yote yaliyotajwa katika Sheria Ndogo hii na
sheria husika za afya kwa umma;
“jengo la biashara” maana yake ni jengo lolote lililojengwa
na kuidhinishwa na Halmashauri kwa ajili ya
kufanya biashara iliyokusudiwa;

“kaya” maana yake ni familia inayojumuisha baba, mama, mtoto au watoto na mtu mwingine yeyote anayeishi na familia hiyo au watu wanaokaa katika nyumba moja na kuishi kama familia au mtu yeyote anayeishi peke yake katika chumba au nyumba kwenye eneo la Halmashauri;

“kero” maana yake ni kitu chochote ambacho kipo katika hali yoyote iwe kinatumika, kimewekwa, kimejengwa au ni kichafu kiasi cha kusababisha-

(a) hatari kwa viumbe na maisha ya binadamu;

(b) harufu mbaya au harufu ya kuudhi au kuleta kinyaa;

(c) kuzaliana kwa wadudu hatari kama vile inzi, mende, sisimizi, panya, nyoka, nyuki, kunguni au viumbe wengine hatari;

“kibali” maana yake ni idhini ya maandishi inayotolewa na Halmashauri kwa mujibu wa Sheria Ndogo hii;

“magonjwa ya mlipuko” maana yake ni magonjwa yanayotokea kwa muda mfupi ya kuambukiza na kuenea kwa haraka na kuathiri watu wengi ndani ya muda mfupi yanayoweza kutolewa amri ya taadhari, ikijumuisha kupooza, kipindupindu, kuhara, surua na homa ya matumbo;

“maji taka” maana yake ni maji yenye mchanganyiko wa kinyesi, mkojo, na maji kutoka katika masinki ya kuogea, kutema mate na kunawia mikono, pamoja na maji yenye mchanganyiko wa vitu vingine vyenye asili ya kemikali au visivyo na kemikali;

“mifugo” maana yake ni ng’ombe, punda, nguruwe, mbuzi, mbwa, kondoo au kuku na wanyama wengine wote wafugwao majumbani;

“mkazi” maana yake ni mtu yeyote anayeishi katika eneo la Halmashauri na ambaye ana kaya au anaishi katika kaya au taasisi iliyopo katika eneo la Halmashauri;

“Mkurugenzi” maana yake ni Mkurugenzi wa Halmashauri ya Manispaa ya Iringa au Afisa yeyote aliyeteuliwa kutekeleza majukumu ya Mkurugenzi chini ya Sheria Ndogo hii;

Sura ya 191

“taka” ina maana iliyotolewa katika Sheria ya Usimamizi wa Mazingira;

“taka ngumu” maana yake ni kitu chochote, tofauti na

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

kimiminika, ambacho baada ya kutumika kimepoteza thamani yake kwa jamii husika, na ambacho uwepo wake katika eneo husika unaweza kusababisha madhara au kuhatarisha afya ya jamii; na “wakala” maana yake ni mtu binafsi, kikundi, taasisi au kampuni iliyoteuliwa kukusanya ada na ushuru kwa niaba ya Halmashauri chini ya Sheria Ndogo hii.

Wajibu na mamlaka ya Halmashauri

- 4.-(1) Halmashauri itakuwa na wajibu wa-
- (a) kusimamia utekelezaji wa shughuli za usafi, afya na mazingira;
 - (b) kutoa elimu kwa wananchi juu ya umuhimu wa kufuata kanuni za afya, usafi na kutunza mazingira; na
 - (c) kufanya ukaguzi ili kuhakikisha uzingatiaji wa kanuni za afya, usafi na utunzaji wa mazingira ndani ya eneo la Halmashauri.
- (2) Halmashauri itakuwa na mamlaka ya-
- (a) kuteua mtu yeyote, wakala, kikundi au taasisi kutekeleza shughuli za usimamizi wa afya, usafi na mazingira kwa niaba ya Halmashauri kwa mujibu wa Sheria Ndogo hii;
 - (b) kumchukulia hatua za kisheria mtu yoyote anayekiuka Sheria Ndogo hii au sheria nyingine inayohusiana na afya, usafi na usimamizi wa mazingira; na
 - (c) kuingia mkataba na mtu yeyote, taasisi au kampuni kutelekeza shughuli za usimamizi wa afya, usafi na mazingira kwa niaba ya Halmshauri katika eneo ndani ya Halmashauri.

Wajibu wa kila mkazi au mfanyabiashara

- 5.-(1) Kila mkazi au mfanyabiashara anayemiliki jengo au eneo la biashara atakuwa na wajibu wa kuhakikisha kwamba-
- (a) majani yanayozunguka jengo lake au makazi yanakatwa au kupaliliwa na kuondolewa katika eneo lake;
 - (b) taka ngumu zote ikijumuisha mifuko ya plastiki zinakusanywa na kuhifadhiwa katika eneo lililoruhusiwa na Halmashauri;
 - (c) maji taka yanaelekezwa ndani ya mfumo wa maji taka;

- (d) anaboresha na kupaka rangi jengo lake kila linapochakaa;
- (e) anakuwa na choo kilicho bora na kisafi wakati wote;
- (f) anashiriki siku ya usafi ya Jumamosi ya kila mwisho wa mwezi au katika siku itakayopangwa na Halmashauri;
- (g) anaondoa uchafu ikiwemo mchanga, majani, nyasi au vitu vingine vinavyofanana na hivyo katika mifereji ya maji ya mvua inayomzunguka au kupita kando ya nyumba, eneo la biashara au kiwanja chake na kuhakikisha mifereji hiyo inakuwa safi wakati wote;
- (h) taa yenye mwanga inawekwa nje ya jengo analoishi au analolitumia kwa shughuli yoyote na atatakiwa kuiwasha wakati wa usiku;
- (i) hakuna mkusanyiko wa taka, maji taka au taka ngumu ambazo zinaweza kuathiri upitishaji wa maji ya mvua na hivyo kuruhusu uwepo wa mazalia ya mbu au wadudu wengine wenye madhara kwa afya ya binadamu na mazingira kwa ujumla;
- (j) anafanya uchambuzi wa taka kulingana na aina ya taka husika.

(2) Kila mfanyabiashara wa matunda au miwa anapaswa kuhakikisha kuwa ana chombo maalumu cha kuhifadha maganda au mabaki ya matunda.

(3) Mtu yeyote anayetupa taka au uchafu wowote au kuacha taka au uchafu kwenye nyumba, kiwanja, mfereji wa maji ya mvua, barabara au eneo linalopakana na nyumba au ardhi yoyote au karibu na maeneo ya nyumba au mahali popote pasipotengwa kwa shughuli hiyo anatenda kosa.

Kibali cha
matengenezo
ya vyombo vya
moto

6.-(1) Matengenezo ya magari, pikipiki na mitambo yatatakiwa kufanyika kwenye karakana, gereji au maeneo yaliyoruhusiwa baada ya kupata kibali rasmi kutoka Halmashauri.

- (2) Mtu yeyote ambaye-
 - (a) anatengeneza gari, pikipiki au mtambo wowote katika eneo la makazi, eneo la wazi au eneo ambalo halikutengwa kwa shughuli hiyo;
 - (b) anaegsha magari mabovu kwenye njia ya miguu,

mtaa, uchochoro, mitaro, maeneo ya wazi au barabarani na kusababisha adha kwa wakazi au watumiaji wa njia hiyo;

(c) anamwaga ovyo au kutiririsha mafuta, mafuta machafu na grisi katika maeneo yasiyoruhusiwa; au

(d) anafanya biashara ya kuosha gari, pikipiki au mtambo wowote katika eneo ambalo halikutengwa kwa shughuli hiyo au kuruhusu eneo lake kutumika kwa shughuli za kuosha vyombo vya moto katika maeneo ambayo hayakutengwa kwa shughuli hizo,

bila kupata kibali rasmi kutoka Halmashauri, anatenda kosa.

Udhibiti wa kelele kwa shughuli mbalimbali za kijamii

7. Mtu yeyote hataruhusiwa kusababisha kelele, ikijumuisha kufungulia muziki kwa sauti ya juu kupita kiasi na kelele za kiwanda, jenereta au kitu kingine chochote, bila kupata kibali cha Halmashauri.

Wajibu wa Halmashauri kusimamia vyanzo vya maji

8. Halmashauri itakuwa na wajibu wa-

(a) kusimamia na kulinda vyanzo vya maji;

(b) kuchukuwa hatua za kisheria dhidi ya mtu yeyote atakayeharibu chanzo cha maji, kuchafua chanzo cha maji au kushindwa kushiriki katika shughuli za kuhifadhi vyanzo vya maji bila sababu ya msingi; na

(c) kupanda miti isiyonyonya maji katika vyanzo vya maji kwa kuzingatia maelekezo ya kitaalamu.

Makosa yanayohusiana na vyanzo vya maji

9. Mtu yeyote ambaye-

(a) ananawa, kuoga, kufulia nguo au kunywesha mifugo karibu au kwenye chanzo cha maji;

(b) anafuga au kujenga boma la mifugo karibu, au kuruhusu mkojo ya mifugo au maji machafu kuelekea karibu, na chanzo cha maji;

(c) anafanya shughuli yoyote ikiwemo, kujenga, kulima, kukata miti, kuchunga mifugo au jambo lingine lolote, ndani ya umbali wa mita sitini toka vyanzo vya maji au maeneo yanayohifadhiwa, zinazoweza kuharibu kwa namna yoyote chanzo cha maji au hifadhi ya mazingira;

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

- (d) anamiliki eneo la chanzo cha maji asili;
- (e) anaelekeza mabomba ya maji machafu kwenye chanzo cha maji;
- (f) anaunganisha maji ya mvua na maji taka au kutapisha choo na kutiririsha vinyesi vya mifugo au binadamu kwenye chanzo cha maji au mfereji wa maji ya mvua; au
- (g) anaweka kitu chochote chenye sumu kwenye chanzo cha maji,

anatenda kosa.

Kutiririsha maji taka

10.-(1) Mtu hataruhusiwa kutiririsha au kumwaga au kuruhusu au kusababisha kutiririsha au kumwaga maji taka barabarani, uchochoroni kwenye mifereji, mtoni, mabonde, kwenye vyanzo vya maji au sehemu yoyote ambayo haijatangwa kwa ajili ya kuhifadhi maji taka.

(2) Kila kiwanda kinachozalisha maji taka kitakuwa na wajibu wa kuhakikisha kuwa kinaunganisha maji taka au kujenga mifereji na mabwawa kwa ajili ya kuhifadhi maji taka.

(3) Kila mmiliki wa nyumba atapaswa kuwa na karo la kuhifadhi maji taka na atawajibika kunyonya maji taka kutoka katika karo hilo iwapo litajaa na itakuwa ni kosa kwa mtu yeyote kuacha karo kujaa na kutiririsha maji taka barabarani au sehemu yoyote isiyoruhusiwa.

Taka za viwanda

11.-(1) Kila mmiliki wa kiwanda atakuwa na wajibu wa kuhakikisha kuwa taka kama vile vumbi, kelele, harufu mbaya, maganda, moshi, maji taka na taka nyingine zinazoweza kuleta kero au adha kwa ujumla haziwafikii, wala hazileti kero au madhara kwa, binadamu na viumbe hai wengine.

(2) Mtu yeyote atakayekiuka masharti ya aya ndogo ya (1) atakuwa ametenda kosa.

Taka hatarishi

12. Mtu, kampuni, wakala au taasisi haitaruhusiwa kuendesha shughuli za uchomaji wa taka hatarishi bila kupata kibali kutoka Halmashauri.

Utengenezaji na uuzaji vyakula

13. Mtu yeyote hataruhusiwa kutengeneza, kuchoma, kupika, kuchemsha na kuuza chakula cha aina yoyote mahali popote au kwenye nyumba yoyote isipokuwa kam ametimiza

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

masharti na kanuni za afya.

Uuzaji wa
vyakula
vilivyopikwa

14. Kila mtu anayeendesha biashara ya vyakula vya kupikwa au kukaangwa atakuwa na wajibu wa kuhakikisha vyakula hivyo vinahifadhiwa kwenye sanduku lililotengenezwa kwa mbao safi na kuwekwa kioo kuzuia inzi, vumbi na wadudu waletao madhara kwa afya ya binadamu.

Usalama wa
matumizi ya
maji

15.-(1) Kila mkazi anapaswa kuhakikisha kwamba maji yote yanayotumika kwa kunywa ni safi na salama bila kujali yanatoka kwenye chanzo gani cha maji.

(2) Kila mmiliki wa kisima atapaswa kuhakikisha maji ya kisima yamepimwa ili yawe salama kwa matumizi.

Makatazo

16.-(1) Mtu anayefanya biashara ya kuuza vyakula ambavyo havijapikwa atapaswa kuviweka juu ya meza na kuhakikisha kuwa vyakula hivyo haviwekwi chini.

(2) Mtu hataruhusiwa kupanga vyakula nje ya duka la vyakula.

(3) Mtu anayehusika na biashara, hospitali, taasisi, kaya, jengo au kiwanda hatafanya shughuli itakayosababisha uchafuzi wa anga hewa kwa kuachilia moshi angani unaoweza kuleta madhara kwa binadamu, mimea na viumbe hai.

(4) Mtu yeyote atakayekiuka masharti ya kifungu hiki anatenda kosa.

Uzuiaji wa
shughuli
wakati wa
magonjwa ya
mlipuko

17.-(1) Mkurugenzi anaweza kutoa amri ya kuzuia shughuli yoyote isifanyike kama vile utengenezaji wa vyakula, pombe, mijumuiko, sherehe na mikusanyiko yoyote kwa kutangaza kwa njia ya kipaza sauti, maandishi au kupitia vyombo vya habari endapo atakuwa na sababu ya kuamini kwamba shughuli hiyo inaweza kusababisha kuenea kwa magonjwa ya mlipuko na kuleta athari kwa maisha ya binadamu.

(2) Mkurugenzi anaweza kumkamata mtu yeyote ambaye atakiuka amri ya zuio la kufanyika kwa shughuli ya uuzaji wa vyakula wakati wa magonjwa ya mlipuko na kumchukulia hatua kwa mujibu wa masharti ya Sheria.

(3) Wakati wa utekelezaji wa masharti ya kifungu kidogo cha (2), Mkurugenzi anaweza kukamata vyakula

vinavyohusika na ukiukwaji na endapo-

- (a) ni vyakula vinavyoharibika kwa haraka, kuviharibu vyakula hivyo; au
- (b) ni vyakula visivyoharibika kwa haraka, kuvihifadhi kwa ajili ya hatua stahiki za kisheria.

Machinjio na maduka ya nyama

18.-(1) Mtu atakayechinja au kuuza nyama ya aina yoyote katika maeneo yasiyokuwa machinjio au maduka ya nyama au katika maeneo yasiyoruhusiwa na Halmashauri anatenda kosa.

(2) Kila mmiliki wa duka la kuuzia nyama atapaswa kuhakikisha kwamba duka lake-

- (a) ni jengo la kudumu lililowekwa marumaru nyeupe katika sakafu na ukutani hadi urefu wa futi sita kutoka usawa wa sakafu;
- (b) lina maji safi na misumeno ya kukatia nyama;
- (c) lina kabati ya vioo na jokofu la kuhifadhia nyama na sehemu za mizani;
- (d) lina pipa la kuhifadhia taka; na
- (e) lina mavazi maalumu kwa ajili ya kuendeshea biashara ikiwemo aproni, mabuti meupe na kofia.

(3) Muuzaji wa nyama atatakiwa kuvaa vazi jeupe pamoja na aproni nyeupe na atapaswa kupima afya kila baada ya miezi sita.

Uendeshaji wa biashara ya nyumba za kulala wageni na hosteli

19.-(1) Kila mmiliki wa nyumba za kulala wageni na hosteli au nyumba za biashara atakuwa na wajibu wa kuhakikisha anapata kibali kutoka Halmashauri kabla hajaanza biashara.

(2) Endapo mmiliki hajakidhi masharti ya kiafya Halmashauri inaweza kuzuia kibali cha kuendesha biashara ya nyumba za kulala wageni au hosteli mpaka hapo mmiliki atakapokuwa amekidhi masharti yaliyotolewa na Halmashauri.

Masharti ya kibali cha biashara ya nyumba za kulala wageni, n.k.

20. Kibali cha kuendesha biashara ya nyumba za kulala wageni, mgahawa, hoteli na hosteli kitatolewa baada ya Halmashauri kujiridhisha kuwa katika majengo hayo kuna-

- (a) mwanga na hewa ya kutosha;
- (b) nafasi na vifaa au samani za kutosha;
- (c) mfumo wa uondoshaji wa maji taka na taka

- ngumu wa kuaminika;
- (d) usafi wa jumla wa jengo na vifaa vyake;
 - (e) vyoo na mabafu kwa jinsia zote;
 - (f) vifaa vya zimamoto;
 - (g) tanki la kuhifadhia maji safi;
 - (h) vyoo na bafu vilivyowekwa marumaru katika sakafu na katika kuta hadi urefu wa futi sita kutoka usawa wa sakafu;
 - (i) kuwa na jozi zaidi ya mbili za mashuka, foronya za mito na magodoro kwa kila kitanda na ziwe na rangi isiyoficha uchafu;
 - (j) kuwepo na sehemu maalumu ya kufulia na kuanikia nguo; na
 - (k) stoo na chumba cha kubadilishia nguo kwa ajili ya wafanyakazi.

Upimaji wa afya

21.-(1) Kila mmiliki wa sehemu inayotoa huduma ya hoteli, migahawa, baa, bucha, sehemu za kuokea mikate, nyumba za kulala wageni, grosari au mtu yeyote anayetengeneza chakula kwa ajili ya kuuza atapaswa kuhakikisha kuwa wahudumu wake wanapima afya kila baada ya miezi sita.

(2) Mmiliki yeyote atakayeruhusu mhudumu yeyote kufanya kazi bila kupimwa afya yake anatenda kosa.

Uwezo wa kukagua

22.-(1) Afisa Mwidhiniwa anaweza, wakati wowote wakati wa saa za kazi na wakati wowote ukaguzi maalumu utakapohitajika, kuingia katika jengo lolote kwa lengo la kukagua uzingatiaji na utekelezaji wa Sheria Ndogo hii.

(2) Mkurugenzi anaweza kutoa amri ya kufungwa kwa biashara yoyote au jengo ambalo halijakaguliwa au lililokaguliwa na kukutwa limekiuka kanuni na masharti ya afya.

Ada ya ukaguzi

23.-(1) Ada ya ukaguzi wa afya italipwa kila mwanzo wa mwaka wa fedha wa Halmashauri.

(2) Mtu yeyote atakayeshindwa kulipa ada ya ukaguzi katika kipindi cha miezi miwili baada ya mwaka wa fedha kuanza atawajibika kulipa kiwango hicho pamoja na adhabu ya asilimia hamsini ya kiwango anachodaiwa.

Udhibiti wa

24. Mtu yeyote atakayesafirisha mawe, mchanga au

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

ubebaji kokoto, mawe na mchanga kokoto katika eneo la Halmashauri atahakikisha kuwa chombo anachotumia kusafirisha kimefunikwa ili kuzuia kumwagika na kuchafua mazingira.

Ufuaji wa nguo 25. Mtu yeyote anayekusudia kufanya biashara ya kufua nguo atapaswa kupata hati ya usafi kabla ya kuanza biashara hiyo.

Kuchoma au kusababisha moto 26.-(1) Mtu yeyote ambaye-
(a) anachoma moto kwa namna yoyote ile katika maeneo yaliyoko katika eneo la Halmashauri;
(b) anachoma moto taka ndani ya eneo la Halmashauri; au
(c) anaandaa shamba kwa njia ya kuchoma moto, anatenda kosa.

(2) Endapo moto mkubwa utatokea katika eneo la Halmashauri, kiongozi wa eneo husika atawajibika kutoa ishara ya hatari kwa kutumia njia iliyo zoeleka na kuhamasisha wakazi wa eneo hilo kushiriki katika zoezi la kuzima moto huo.

(3) Mkazi wa eneo la Halmashauri linalowaka moto ambaye atashindwa kushiriki katika zoezi la kuzima moto bila sababu za msingi atakuwa ametenda kosa.

Uvunaji miti 27.-(1) Mtu hataruhusiwa-
(a) kukata miti katika eneo la Halmashauri kwa ajili ya matumizi ya aina yoyote bila kupata kibali maalumu cha Halmashauri; au
(b) kuvuna miti katika msitu ambao umehifadhiwa kwa ajili ya viumbe maalumu ambao ni rasilimali ya Taifa.

(2) Halmashauri itatakiwa kuhakiki iwapo miti inayovunwa katika eneo lake imekomaa na inafaa kwa ajili ya matumizi.

(3) Mtu yeyote anayetaka kuvuna miti kwa ajili ya kuchoma mkaa, mbao au kuni atatakiwa kuwa na eneo maalumu lililoidhinishwa na Halmashauri kwa ajili ya kazi hiyo na atatakiwa kulipa ada ya uvunaji miti kwa kiwango kilichoainishwa kwenye Jedwali la Kwanza la Sheria Ndogo hii.

Wajibu wa kupanda miti 28. Mkazi au mmiliki wa jengo la makazi au biashara

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

ndani yae neo la Halmashauri atawajibika kupanda na kutunza miti katika eneo lake kwa utaratibu ulioainishwa katika Jedwali la Pili la Sheria Ndogo hii.

Bustani za Halmashauri

29. Mtu hataruhusiwa kufanya biashara yoyote au kujenga jengo la kudumu katika eneo la bustani la Halmashauri.

Ushirikishaji wa jamii katika uhifadhi na utunzaji wa mazingira

30. Mkurugenzi anaweza kutoa kibali au kuingia mkataba na mtu yeyote, taasisi, kikundi binafsi au asasi ya kiraia, ndani ya Halmashauri katika ngazi ya Mtaa, Kata au Wilaya katika kuboresha bustani, eneo la wazi, kusimamia uhifadhi na usimamizi wa mazingira.

Tathmini ya athari kwa mazingira na jamii

31.-(1) Miradi yote inayotekelezwa ndani ya Halmashauri haitaendelezwa bila kufanyiwa tathmini ya athari ya mazingira.

(2) Kila mpendekezaji wa mradi atawajibika kulipa Halmashauri asilimia kumi ya gharama ya tathmini ya athari za mazingira kama ada ya ukaguzi na usimamizi wa mradi husika.

Uhifadhi wa mazingira ya mto au bwawa na udhibiti wa rasilimali zake

32.-(1) Mtu hataruhusiwa-

- (a) kutumia uvuvi wa juva, baruti, sumu au mkuki;
- (b) kuvulia nyavu kwenye maji mafupi au kwenye miamba;
- (c) kuvua, kuokota, kuchukua au kufanya kitendo chochote kwenye maeneo tengefu ya samaki isipokuwa kwa kibali maalumu cha Halmashauri;
- (d) kuvua samaki bila kuwa na leseni ya uvuvi;
- (e) kutumia chombo cha uvuvi kisichokuwa na namba za usajili pamoja na leseni ya chombo hicho; au
- (f) kufanya biashara au kupiga picha kwenye ufukwe bila kibali cha Halmashauri.

(2) Mtu yeyote atakayekiuka masharti ya kifungu kidogo cha (1) atakuwa ametenda kosa.

Makosa yanayotokana na uharibifu wa misitu

33. Mtu ambaye-

- (a) atachoma au kusababisha moto katika misitu bila kibali;
- (b) atashindwa kushiriki katika kuzima moto kwenye

- msitu wa eneo lake;
- (c) atavuna mazao ya miti katika misitu iliyohifadhiwa bila kibali;
 - (d) atachoma mkaa na kukata kuni katika eneo la msitu bila kibali;
 - (e) atafyeka nyasi, kung'oa visiki kwenye misitu bila kibali;
 - (f) atachunga mifugo kwenye eneo lolote lililopandwa miti au misitu iliyohifadhiwa kama bustani ya mtu;
 - (g) atakata miti au kuchungia mifugo kwenye miti ailiyopandwa kwa ajili ya kuzuia mmomonyoko wa udongo au kinga upepo;
 - (h) atabandua magome ya miti kwa ajili ya kueneza vilindo, mzinga na vitu vingine bila ya kuwa na vibali; au
 - (i) atalima au kukata miti katika vyanzo vya maji, milima, kando ya njia, makorongo na sehemu nyingine zozote zinazohifadhiwa ili kupunguza mmomonyoko wa udongo,
- anatenda kosa.

Udhibiti wa utupaji wa taka

- 34.-(1) Halmashauri itakuwa na wajibu wa-
- (a) kutenga eneo maalumu kwa ajili ya kutupia taka;
 - (b) kuweka vyombo maalumu vya kutunzia taka katika maeneo ya Halmashauri; na
 - (c) kutoa huduma ya uzoaji taka kwa malipo kutoka kwa wazalishaji wa taka hadi kwenye dampo.
- (2) Itakuwa ni wajibu kwa-
- (a) kila mmiliki wa nyumba au mpangaji au mfanyabiashara kuhakikisha kuwa ana chombo imara chenye mfuniko kwa ajili kuhifadhia taka ngumu kabla hazijachukuliwa kwa ajili ya kwenda kutupwa katika eneo lilotengwa kwa ajili ya kuhifadhi taka; na
 - (b) kila mkazi au mtu yeyote kutunza na kuhifadhi vyombo vya kuhifadhia taka vinavyowekwa na Halmashauri.
- (3) Mtumiaji wa chombo cha usafiri binafsi au cha umma atapaswa kutupa taka kwenye chombo cha kuhifadhia taka kilichomo kwenye chombo cha usafiri husika na mtu yeyote atakayetupa taka nje ya chombo cha usafiri

anachotumia anatenda kosa.

(4) Mkazi au mtu yeyote atawajibika kutupa taka katika vyombo maalumu vilivyowekwa kwa ajili ya kutunzia taka katika maeneo maalumu yaliyotengwa.

(5) Mtu atakayetupa taka au uchafu wowote au kuacha takataka au uchafu katika maeneo ya makazi, biashara, uchochoro, kiwanja, mifereji ya maji ya mvua, barabara, hifadhi ya barabara au mahali popote ambapo hapajatengwa kwa ajili ya kutupa taka anatenda kosa.

Ushiriki wa vikundi jamii katika usafi wa mazingira

35. Halmashauri itakuwa na jukumu la kuhamasisha uundaji wa vikundi jamii na kuvitambua ili kuviwezesha kufanya shughuli za uhibitaji wa taka ngumu pamoja na usafi wa mazingira baada ya kuingia mkataba na Halmashauri.

Ada ya uzoaji taka

36.-(1) Halmashauri itatoza ada ya uzoaji taka kila mwezi kutoka kwa kila kaya, wamiliki wa nyumba za biashara, taasisi na kampuni zilizopo ndani ya eneo la Halmashauri kwa viwango vilivyoainishwa katika Jedwali la Tatu la Sheria Ndogo hii.

(2) Ada ya kila mwezi italipwa kila tarehe 30 ya kila mwezi ndani ya mwezi husika na italipwa kwa Afisa Mwidhiniwa ambaye atatoa stakabadhi ya malipo yatakayolipwa kwa njia ya kieletroniki na atajaza katika rejista ya wazalishaji taka.

(3) Endapo mzalishaji wa taka atashindwa kulipia gharama ya huduma ya uzoaji taka kwa kipindi cha miezi miwili mfululizo, Halmashauri itamchukulia hatua za kisheria ikiwa ni pamoja na kufikishwa mahakamani.

Wajibu wa kuwa na choo na kukitumia

37.-(1) Kila mmiliki wa nyumba au mpangaji atahakikisha kwamba nyumba yake ina-

(a) choo safi, imara kwa matumizi ya wakazi wa nyumba hiyo na kinatumika wakati wote; na

(b) sehemu maalumu ya kunawia mikono ikiwa na maji safi na sabuni maalumu ya kimiminika.

(2) Choo kinatakiwa kujengwa umbali wa mita sitini kutoka chanzo chochote cha maji.

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

Vyoo vya
umma

38.-(1) Halmashauri inaweza kujenga choo cha umma au kumruhusu mtu binafsi, vikundi vya watu au taasisi kujenga vyoo vya umma katika maeneo ambayo Halmashauri itaona inafaa.

(2) Vyoo vitakavyojengwa kwa mujibu wa Sheria Ndogo hii vitatakiwa-

- (a) kuwa vya kudumu;
- (b) kuwa na matundu yasiyopungua mawili kwa wanawake na mawili kwa wanaume;
- (c) kuwa na mfumo madhubuti wa maji na uwepo wa maji ya kutosha yaliyo safi na salama;
- (d) kuwa na chombo cha kuhifadhia maji ya akiba;
- (e) kuwa na bafu ya wanaume na wanawake;
- (f) kuwa na chumba maalumu cha kuvutia sigara;
- (g) kuwa na sehemu ya haja ndogo kwa wanaume; na
- (h) kuwa na chombo maalumu chenye mfuniko cha kuhifadhia taka zisizoweza kusukumwa na maji.

Vyoo vya
muda katika
mikusanyiko

39. Mtu, kikundi au taasisi yoyote yenye lengo la kukusanya watu kwa madhumuni ya mkutano au sherehe au mkusanyiko wowote itapaswa, endapo eneo hilo hakuna choo cha kudumu, kuweka au kujenga vyoo vya muda kwa idhini ya Halmashauri.

Vyoo katika
majengo ya
biashara

40. Kila mmiliki wa jengo la biashara atatakiwa kujenga vyoo kwa kuzingatia jinsia zote vyenye viwango vinavyokubalika chini ya Sheria Ndogo hii kwa ajili ya matumizi ya wateja wake.

Notisi ya
kujenga au
kurekebisha
choo

41.-(1) Endapo katika ukaguzi wa afya itagundulika kuwa nyumba yoyote haina choo au choo kilichopo kimejaa au hakifai kwa matumizi ya binadamu, Afisa Mwidhiniwa atatoa notisi kwa mmiliki wa nyumba au mpangaji akiainisha masharti ya kujenga au kurekebisha choo husika.

(2) Bila kuathiri masharti ya kifungu kidogo cha (1), Halmashauri inaweza kuamuru nyumba au jengo husika lisitumike kwa shughuli za makazi au biashara hadi hapo hali hiyo itakapokuwa imerekebishwa.

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

Notisi ya kuondoa kero

42.-(1) Endapo Afisa Mwidhiniwa atagundua kuwa eneo alilokagua lina kero yoyote atatoa notisi ya siku saba kwa mmiliki wa nyumba, mpangaji, mtumiaji au mtu yeyote anayehusika akimtaka kuondoa kero hiyo.

(2) Mtu yeyote atakayeshindwa kutekeleza masharti ya notisi aliyopewa chini ya kifungu kidogo cha (1) ndani ya muda ulioainishwa kwenye notisi anatenda kosa.

Eneo maalumu la uvutaji sigara

43.-(1) Mtu hataruhusiwa kuvuta sigara kwenye eneo la wazi au kwenye mikusanyiko ya watu.

(2) Kila mmiliki wa jengo la biashara za baa, hoteli, mgahawa, kumbi za starehe, viwanja vya michezo na burudani, ofisi za umma na binafsi anatakiwa kutenga eneo maalumu la kuvutia sigara na kuweka chombo cha kuhifadhia majivu na vichungi vya sigara.

Uteuzi wa wakala

44.-(1) Halmashauri inaweza kuteua wakala wa kukusanya ada kwa niaba yake kwa mujibu wa Sheria Ndogo hii.

(2) Wakala atakayeteuliwa chini ya Sheria Ndogo hii atakuwa na wajibu wa kuzingatia masharti ya mkataba alioingia na Halmashauri ikijumuisha kukusanya kwa kutumia mfumo wa kielekitroniki ada mbalimbali zinazohusiana na afya, usafi na usimamizi wa mazingira kwa niaba ya Halmashauri katika eneo lake alilopangiwa na kwa viwango vilivyoidhinishwa chini ya Sheria Ndogo hii.

Makosa

45. Mtu atakayekiuka masharti yaliyowekwa na Sheria Ndogo hii atakuwa ametenda kosa na endapo atapatikana na hatia atawajibika kulipa faini isiyozidi shilingi laki tatu au kifungo kwa kipindi kisichozidi miezi kumi na mbili jela au vyote kwa pamoja.

Kufifilisha kosa

46. Mkurugenzi atakuwa na uwezo wa kufifilisha kosa kwa kumtoza mtu yeyote aliyetenda kosa kwa mujibu wa Sheria Ndogo hii kiasi cha Shilingi laki mbili endapo mkosaji atakiri kosa na kuwa tayari kujaza fomu maalum iliyoainishwa katika Jedwali la Nne la Sheria Ndogo hii.

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

JEDWALI LA KWANZA

(Limetengenezwa chini ya aya ya 27(3))

ADA YA UVUNAJI MITI

Na.	Aina ya Huduma	Kiasi cha ada (Shilingi)
1.	Mkaa	1,000/= kwa gunia
2.	Mbao	5,000/= kwa kila ujazo wa mita (1M3)
3.	Kuni	3,000/= kwa kila ujazo wa mita moja (1M3)

JEDWALI LA PILI

(Limetengenezwa chini ya aya ya 28)

KUPANDA MITI

Ujazo wa juu	Miti isiyopungua 2
Ujazo wa kati	Miti isiyopungua 4
Ujazo wa chini	Miti isiyopungua 5

JEDWALI LA TATU

(Limetengenezwa chini ya aya ya 36(1))

ADA ZA HUDUMA ZA USAFI

Na.	Taasisi	Kiwango cha Ada na Ushuru kwa Mwaka	Kiwango cha Ushuru kwa mwezi
1	Taasisi zote na mashirika	360,000/=	30,000/=
2	Hospitali ya rufaa	600,000/=	50,000/=
3	Viwanda vikubwa	720,000/=	60,000/=
4	Viwanda vya kuoka mikate (bakery)	360,000/=	30,000/=
5	Hoteli za kitalii	360,000/=	30,000/=
6	Migahawa	60,000/=	5,000/=
7	Useremala	50,000/=	4,200/=
8	Wauza mbao	30,000/=	5,000/=
9	Mashine ndogo za kusaga na kukoboa	50,000/=	3,000/=
10	Duka la jumla	50,000/=	5,000/=
11	Duka la rejareja	36,000/=	3,000/=
12	Ghala (godown)	360,000/=	30,000/=
13	Viwanda vidogo vya kukamua mafuta	50,000/=	5,000/=

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

14	Bucha za samaki au nyama	36,000/=	3,000
15	Machinjio	360,000/=	30,000/=
16	Baa	60,000/=	5,000/=
17	Mini-sepermarket	50,000/=	5,000/=
18	Vilabu vya pombe za kienyeji	36,000/=	3,000/=
19	Nyumba ya kuishi	24,000/=	2,000/=
20	Saluni za wanaume na wanawake	36,000/=	3,000/=
21	Grocery (mini-bar)	36,000/=	3,000/=
22	Nyumba za kulala wageni	60,000/=	5,000/=
23	Vituo vya afya na zahanati	60,000/=	5,000/=
24	Vituo vya mafuta	50,000/=	5,000/=
25	Maduka ya vifaa vya ujenzi	60,000/=	5,000/=
26	Maduka ya nguo na viatu	36,000/=	3,000/=
27	Maduka ya dawa (pharmacy)	60,000/=	5,000/=
28	Maduka ya dawa muhimu	36,000/=	3,000/=
29	Maduka ya mikate na vitafunwa	30,000/=	2,500/=
30	Maduka ya vyombo	30,000/=	2,500/=
31	Maduka ya kuuza magodoro na samani	30,000/=	2,500/=
32	Maduka ya kuuza spea za magari, pikipiki na baiskeli	60,000/=	5,000/=
33	Maduka ya kuuza shajaa na kurudufisha (photocopy)	60,000/=	5,000/=
34	Maduka ya kuuza vipodozi	36,000/=	3,000/=
35	Maduka ya kuuza simu au saa	36,000/=	3,000/=
36	Mama na baba lishe	30,000/=	2,500/=

Sheria Ndogo ya Afya, Usafi Na Usimamizi wa Mazingira ya Halmashauri ya Manispaa ya Iringa

Tangazo la Serikali Na.30 (Linaendelea.)

JEDWALI LA NNE

(Limetengenezwa chini ya aya ya 46)

FOMU YA KUFIFILISHA KOSA

Mimi..... nakiri KWA HIARI YANGU MWENYEWWE mbele ya ambaye ni Mkurugenzi wa Halmashauri ya Manispaa ya Iringa kwamba mnamo tarehe..... ya mwezi Mwaka nilitenda kosa la kukiuka masharti ya aya ya ya Sheria Ndogo ya Afya, Usafi na Usimamizi wa Mazingira ya Halmashauri ya Manispaa ya Iringa ya Mwaka 2023.

Hivyo, kwa kuzingatia masharti ya sheria husika, nipo tayari kulipa kiasi cha ada au ushuru ninayodaiwa pamoja na faini.

NATHIBITISHA KWAMBA MAELEZO HAPO JUU NI YA KWELI NA NIMEYATOA KWA HIARI YANGU KADRI YA UFAHAMU WANGU

Leo tarehe ya mwezi mwaka

Jina

Saini

Mbele ya:

Jina

Cheo

Saini

Tarehe

*Sheria Ndogo ya Afya, Usafi Na Usimamizi wa Mazingira ya Halmashauri ya
Manispaa ya Iringa*

Tangazo la Serikali Na.30 (Linaendelea.)

Nembo na Chapa ya Halmashauri ya Manispaa ya Iringa imebandikwa kwenye Sheria Ndogo hizi kufuatia Azimio lililopitishwa na Mkutano wa Baraza la Madiwani wa Halmashauri ulioitishwa na kufanyika tarehe 28 Januari, 2022 na ulibandikwa mbele ya:-

KASTORI G. MSIGALA,
*Mkurugenzi,
Halmashauri ya Manispaa
Iringa*

IBRAHIM A. NGWADA,
*Meya
Halmashauri ya Manispaa
Iringa*



Dodoma,
30 Novemba, 2023

NAKUBALI,

MOHAMED OMARY MCHENGERWA (Mb.),
Waziri wa Nchi OR-TAMISEMI,